

國朝耆獻類徵初編卷二百二十三目錄

守令九

張召華

楊朝正

李欽

鄒允颺

楊廷望

李慶祖

張文炳

子坊曾孫世濂

孫九鍵世法

九鉞世浣

九錡世濂

孫祐岐

王祚封丁永祺

吳堂

甘國棟

蔡秉公

趙俞

張尙瑗

劉以貴

白畿

補錄

楊廷望

國朝寶鼎錄卷之三

國朝耆獻類徵初編卷二百二十三

通奉大夫前署江西巡撫江西布政使司布政使湘陰李桓輯
守令九

張召華

復齋先生姓張氏華容人也其先世自江南之和州遷居縣之游
橋凡九世而生先生先生幼卽善屬文入學後值吳逆之亂崎嶇
兵革與弟召修負母循環往來巖谷間喘不得息康熙乙丑成進
士知福建之晉江多善政上官將疏薦之而先生以母老乞終養
百姓攀留不得相率供其食用泣送至洛陽橋者數萬人侍養既
二十年乃起爲江西之金谿值歲歉先生請穀得七千餘石多方

賑貸全活甚眾會有上官倚朝貴爲勢其所屬郡縣皆脅使出門下而責以厚贄先生不忍從遂解組歸金谿之百姓攀畱泣送如晉江也當在晉江時有賈人怨其繼母之誅求而不養其父其父詣縣訴賈人行賄於先生乞以貧爲解眾皆爭往視之天方寒賈人衣其父以新衣而自著敝衣爲凍餓可憐之狀且曰有衣皆以奉父矣先生故怒視其父曰子寒如此而不恤之邪呼吏持大杖來先生睨視賈人顏色如平常猝指叱之曰若見若父之將受大杖也而安忍視之不孝何辭卽以大杖扑賈人而其父乃從旁泣先生出賄付其父曰以養爾餘年眾皆快之民逋賦久不能輸及輸逋則賦甚多先生詰知其鬻子也乃捐俸入贖而歸之有守瓜

圃而斃者暮夜莫知其爲誰先生集鄉民於社廟閉門使袒裼觀
之一人膚體傷敗先生叱之曰若往而盜若瓜值若之警相毆相
持以至於此其人卽屈服先生之聽訟仁明多此類晉江人文比
他邑爲盛先生至則益勸勉其父兄使訓誨其子弟其稍屬俊秀
者親加賓禮焉由此晉江之童子試至萬人先生之免金谿而歸
足不履戶外而華容在洞庭旁土卑而賦重當明之季世百姓多
流亡國初定賦準原額每十畝損爲六畝餘其後稍稍增墾而
清丈令下縣官指爲欺隱將以全額上先生曰我無中人之產顧
里人不勝病矣因詣縣官白其事謂此皆湖岸荒餘十常八九浸
於水百姓愚昧不知援例請平誤陷於罪若增比舊額其數幾倍

能不流亡乎夫百姓流亡他日獨不爲官累邪雖畝數不可隱而賦數固可減宜準湖鄉下地例一畝糧止一升縣官信先生素長者察知愚民情實無他卒如先生言華容人蒙其利至今先生名召華字君實

贊曰先生在官前後僅四年故設施未竟然其爲利於民者多矣其議減湖田之賦華容人將築祠以報而先生固止之此所謂陰德也雖使其子孫世爲三公豈爲過乎

右傳劉大櫟撰

楊朝正

楊朝正漢軍鑲白旗人由侍衛出知東昌府既至訪民間利病銳意興革臨清舊有額外銀米稅朝正白巡撫聞於 朝減歸正賦東昌濬河向有額夫率憚役求免至是改爲均役有訟者輒自剖決未嘗委屬吏民憚其嚴明獄事日損月朔望宣講 上諭春秋徧歷郊野課農桑歲莫訪高年者賚之其賢者尤尊異之東阿教諭王璜事繼母孝歲荒救饑民數百監生崔允璧建橋通濟聞設兩渡船朝正請於布政使並旌其門民有蠲金治道者置酒勞之由是人爭向義府治西南地窪下遇大雨泛溢五六十里溺者眾朝正自蠲金八百兩勸大石橋三治道六十丈益增隄禦大水患

息康熙二十四年旱朝正宿齋戒除壇與妻磨麥爲麪作供具然
香籲天曰若知府有臯願身受譴無累百姓伏壇前自子及亥大
雨徧四境明年復旱發倉平糶復蠲金煮粥以食餓人王璜崔允
璧等各蠲米數百石爲助民得不害卒祀名宦祠子宗仁仕至湖
廣總督宗義至河南巡撫

右述彭紹升撰

李欽

君姓李氏名欽字式唐別號陶庵世爲遼之鐵嶺人高祖成功前
明封甯遠伯成樑弟也曾祖如樾太原同知明季殉國難祖思忠
以布衣受知本朝太祖高皇帝累官禮部侍郎提督陝西賜鐵
券世襲贈太保父耀祖儀部郎儀部生子三長錫季錦君其中
子也君少時習舉子業甫入塾若不慧者然性嚴重兀坐終日咿
唔不輟口塾師奇之卒乃於所課書貫通習熟又若夙慧者同舍
郎皆謝不及未幾以冑監入太學限滿官理藩院知事尋出宰清
源丁外艱去服闋余桂東令到官三月以疾卒年僅二十九時康
熙二十四年也君精於吏治以廉介自持其愛民也如子所至得

民之懽心民愛之至於久而不忘清源額丁若干兵燹後死徙者
例宜除而邑之豪族有宜增者或欺隱爲奸君按籍編審先期齋
戒誓於城隍廟其增減一稟於公邑人乃大服邑故多盜君謀得
其魁拘至署以溫語勸諭縱之歸其人感泣至披緇自誓悉召其
黨勸勉之咸歸於善終君之任清源無盜患及君去任空一邑送
之而盜之披緇者與焉君之以德化人多此類其令桂東也甫下
車謁文廟見堂廡傾圯卽捐貲修除不一月而廟遂煥然時當逆
藩吳三桂殘破之餘民流亡過半田皆不治君百計招徠給以牛
種凡軍興後一切供億之不急者力請於上官悉罷之民乃安堵
如故值歲大旱疫癘繼作君爲施糜市藥調治之全活無算異時

官之供給取於民民困於役者無虛日君至則蠲煩滌苛薪水費皆自給桂民德之於其卒也皆痛哭失聲君歿時囊橐蕭然無以爲殮桂民爭輸以粟乃得殮先是君之配覺羅孺人以君病憂鬱遭疾先君數日卒當是時君之子三人藐諸孤耳兩喪並舉舟車之費猝無以辦桂民惻然哀之咸自勒帛其首老穉悉盆香以送其丁壯則輪輸其力舉櫬至境外數百里而止蓋君之令桂僅三月其樹德於民而民愛之如此君天性孝友不苟訾笑其事儀部公也惟謹儀部公性方嚴以君樸略少文時加譴責厥後儀部公疾君侍湯藥衣不解帶者累旬及儀部公疾愈乃曰吾兒真孝子向乃誤督過之也愛之彌甚君於兄弟曲盡友恭之誼於夫婦閨

門之內若賓客焉方桂東病革時家人以後事請君泣曰吾向在清源吾父死吾不及臨其喪今老母在吾又不克終其養吾天地間罪人也幼子三人吾兄弟任其責耳夫復何言君之內行醇備若此豈獨吏治良哉君生而正直歿猶以神顯當之桂東時民有夢新城隍赴任者而君甫入境見數十人列炬鳴騶而迓於道問諸左右皆弗之見也及卒後停柩舊寺民或負冤抑皆炷香赴訴之理屈者則悚然不敢入今桂民神之尙廟祀不絕云君男子三人世德振德亮德皆具經濟才先後通仕籍

論曰余覽前史所紀若黃霸卓茂皆以吏治循良封侯錫土而茂又圖像南宮列諸元勳之次以今觀君之爲政可與古人相頡頏

矣顧壽不酬德位不配功豈非命也耶君歿之二十年後君之子
世德令吾邑余乃得悉其生平詳著於篇令君賢明其治吾濟也
悉稟君法度傳曰公侯之子孫必復其始君雖不竟其用而其子
之光啟前業必也其亦可以無憾矣

右家傳金德嘉撰

(Faint vertical columns of text, likely bleed-through from another page)

鄒允颺

鄒允颺字彥康以歲貢選寶應縣教諭在職九年康熙二十五年擢湖北當陽縣知縣當陽山谿深險前遭流寇殘殺國初餘孽尙踞竹房諸處軍興旁午咸取給於民名曰差費外此公務派民協助者較諸正供至踰數十倍縣令因以居奇費一徵十其閒士大夫濫免刁民抗徵以至胥役土豪叢窟其中窮簷困於供億積四十餘年力益憊允颺至痛革其弊縣屬稅銀三千二百兩有奇漕米八百餘石聽民以時投納額內無加耗額外無私徵相沿陋例次第釐剔其奏銷公費及奉派雜項皆官自爲償初到任有紅船之役求免不得具陳所費上官謂可倚於民令集搢紳議之衆

欲循例派民允颺曰他縣水次造船取辦猶易爲力今邑處萬山中甯能陸地造乎吾邑向不派修此例一開是貽民無窮之累也乃使人於漢口修造自出銀五百兩不取於民後亦不復派也邑自兵燹之後戶口逃散田委榛莽允颺勸民耕墾聞風歸者如市乃出示新闢地畝果成熟者報官准照下等田六年後起科其舊墾未報者亦依自首律呈報不窮已往有賠荒爲累者亦許開報覈實緩其徵田苦難熟半仰給於蠶麥允颺春日開徵不差催不勾攝出片紙令牌甲按戶分給無驚擾也鄰邑潛江饑上官委以履勘自持糗糒躬親履畝鄰邑令具盤飧供帳悉卻之瀕行者老醵金以獻允颺曰若等方呼庚癸顧斂財爲壽乎鄰民猶吾民也